



BOSTON
PUBLIC
LIBRARY

coll
m

15 pp

L 9 N 34 30

62



HISTOIRE

PRODIGIEUSE DV
FANTOSME CAVALIER SOL-
liciteur, qui s'est battu en duel,
le 27. lanuier 1615. pres Paris.



Leſt croyable que les combats
& les duels eſtoient frequents
& ordinaires en ces premiers
ſiecles que les hommes viuoient diſ-
percez ça & là par les campagnes &
dans les deſerts, ſans conduite, ſans
loix & ſans frein, errâts & vagabonds
comme cheuaux eſchappez : la rai-
ſon cedoit à la force, le pouuoir eſtoit
la ſeule regle du deuoir, & la cupidi-
té auoit toutes choſes à l'abandon,
ſi bien que la brauade & l'vſurpation
eſtoient les ſeuls tiltres d'honneur &
de valeur.

Mais depuis que les hommes vnīs
& assemblez ont fondé des villes &

des loix pour se deffendre de leurs ennemis & d'eux-mesmes, ils ont commencé de cultiuer leurs pays & leurs moeurs, ils ont inuété les sciences & les arts, & se sont addonnez à la vertu, mesme les Nobles, c'est à dire ceux qui en font profession, desirants s'acquérir quelque perfection par dessus le vulgaire, ont preferé la demeure des champs à celle des villes & des citez, comme plus tranquille, & plus propre pour exercer esgallement leurs corps au travail, & leurs esprits aux sciéces & à la contemplation; mais cōme le naturel des hommes se glisse facilement du bien au mal, plusieurs d'entre eux ont degeneré de ce genereux proiect, & n'ont embrassé que des exercices d'excez, & des contemplations d'un honneur imaginaire qui les porte à ceste premiere barbarie & cruauté, qui diuisoit les hommes quand ils estoient

diuisez, comme si en retournant en ceste mesme sollicitude d'ou les premiers hommes sont partis, ils auoient peu reprendre ce premier naturel insipide & inhumain, qui rendoit autrefois les humains capables & coupables de la mesme brutalité, si ce n'est que les dæmons se communiquants plus volôtiers en pleine campagne, dans les deserts & lieux solitaires, leur eussent causé ces furieuses impressions de s'entretuer & couper la gorge les vns aux autres, iusques là que quelque fantosme ait seruy ces iours passez de second à vn gentilhomme qui s'est battu en duel contre deux siens ennemis, les noms desquels ne sont que trop cogneus par leur propre milere & calamité.

Le faict est estrange & neantmoins veritable, qu'un Géttilhomme ayant deux querelles differentes & autant d'ennemis, & ayant accepté de cha-

l'un d'eux en particulier le cartel de
 deffy, se rendist (il y a fort peu de
 temps comme chacun sçait) au lieu
 assigné, ou l'un de ses aduersaires se
 deuoit trouuer, dequoy l'autre qui
 estoit à Paris estant aduert y fust mer-
 ueilleusement indigné contre l'enne-
 my de son ennemy de ce qu'il le pre-
 uenoit au combat, & le frustroit du
 fruiet de la victoire qu'il esperoit
 remporter luy mesme, si bien que
 montant à cheual & courant à bride
 abatue au lieu ou ils estoient, les ayât
 rencontrez en la premiere posture
 que font les combattants qui com-
 mencent à venir aux mains, il leur fist
 le holà, & adressant incontinent sa
 parole à celuy qui concurreoit en hai-
 ne avec luy, n'ayants qu'un mesme
 ennemy, luy dist avec quelque leger
 blaspheme qu'il ne luy appartenoit
 pas de vider sa querelle auparauant
 la sienne, soit qu'il fust le premier en

datte, soit que sa querelle fust de plus
 grande consequence, soit que le sort
 du combat venant à tomber sur leur
 ennemy commun, il luy depleust de
 n'auoir plus à combattre que les ma-
 nes d'un deffunct; l'autre au contrai-
 re desia tout eschauffé, tout ardent
 au combat encommencé, n'estimant
 pas bien seant de quitter la place à ce
 dernier venu, ne manquoit pas de vi-
 ues raisons pour monstrier qu'il se de-
 uoit battre le premier, avec vne fer-
 me resolution d'empescher son des-
 sein au cas qu'il eust voulu entre-
 prendre sur son marché; de sorte que
 peu s'en fallust que ces deux cham-
 pions ne fissent vne eternelle paix
 avec leur ennemy s'entretuant l'un
 l'autre sur le nouveau differend qui
 suruinst entre eux à qui se battoit le
 premier. Mais quoy? le courage ne
 manquoit pas au troisieme pour les
 empescher de se battre, parce qu'il

les auoit desia deuouïé tous deux (l'vn apres l'autre toutesfois) à sa dextre, c'est pourquoy il les prioit de se reseruer au sacrifice qu'il en vouloit faire.

En fin apres de grandes altercations il fust resolu qu'ils s'en iroient tous trois sur le grād chemin passant qui conduist au Bourg la Reine peu esloigné du lieu où ils estoient, & que le premier Gentilhomme qui se presenteroit à leurs yeux, seroit coniué par eux d'assister celuy qui estoit seul.

Ils n'attendirent pas long téps, qu'ils apperceurent vn Caualler à eux incogneu qui venoit à Paris, & auquel l'vn d'eux demanda s'il estoit Gentilhomme, à quoy ayant faict responce que vrayement il l'estoit, & d'ancienne extraction, ils luy repliquerent aussi tost, que puis qu'il estoit tel il ne les refuseroit pas d'vne priere

qu'ils luy vouloient faire, qui estoit de se battre avec eux, & seruir de second à ce Gentil-homme duquel ils estoient ennemis ; Ceste priere sembla de prime abord desplaire à ce Cauahier, qui s'excusa d'estre de la partie, sur ce qu'il disoit estre pressé d'acheuer son voyage, & venir à Paris pour vn procez de consequence, son Procureur & Aduocat luy ayant mandé que sa presence y estoit requise, mesme il leur monstroit les armes dont il esperoit se battre en ce conflict iudiciaire qui luy estoit plus expedient que le diabolique auquel on le vouloit faire entrer, Mais voyant sa noblesse & son courage estre reuoquez en doute par ces deux ialoux auenturiers d'honneur, il se sentist piqué de ceste viue pointille du mespris, & leur dist assez froidement, (non toutesfois sans iurer, & comme par maniere d'acquit) pourquoy

m'importunez vous tant, vous voyez qu'il ne m'en prie pas, à peine eust il lasché ceste parolle, que de la bouche de ce Gentil-homme qui auoit besoing de luy, sortirēt des prieres & supplications, avec des protestations de luy en auoir toute sa vie (s'il en reschappoit) des ressentiments & obligations infiniment grandes, qui eussent peu esmouuoir vn diable mesme à le battre, eust il esté aussi poltron que celuy de Rabelais, ce Cavalier donc prestant son consentement à ceste priere, & ne luy semblant hors de propos de vuidier cest incident auparauant que de faire iuger son procez, accōpagne ces trois Gentils-hommes iusques au lieu assigné, & la ces deux valeureux couples de combattants commencerent avec celuy que chacun d'eux auoit en teste vn furieux combat: le Cavalier incogneu (que les courtisans appel-

lent

lent aujourdhuy le Solliciteur de
 procez) renuerse son homme du pre-
 mier coup & le tuë, & se joinct en
 mesme instant avec celuy duquel il
 s'estoit rendu second, pour en faire
 autant de celuy qui restoit, & en vint
 à bout, aussi facilement & prompte-
 ment que du premier sans aucun re-
 tardement de procedures. Ce second
 victorieux sans vouloir escouter les
 remerciements de celuy pour lequel
 il s'estoit exposé, moins encore des-
 couvrir quel il estoit remonte à che-
 ual, aduertissant ce Gentil homme
 qu'il eust à soigner à ses affaires, &
 obtenir grace pour luy & pour son
 compaignon, & quand à luy qu'il al-
 loit faire les siennes, & disant cela
 pique son cheval vers Paris, laissant
 ce Gentilhomme autant estonné de
 la rencontre d'un si braue second,
 comme il estoit content de voir ses
 ennemis terrassez, *epidumq; recentica de locū.*

L'incertitude rend les hommes plus diligents à rechercher la vertu le siecle present n'est pas infertile en curieux qui se peuuent enquerir quel est ce Cauallier Solliciteur, (ainsi l'appelle t'on par rusee) la curiosité n'a de rien seruy iusques icy, son nom, sa demeure, sa retraicte sont du tout incogneus, on ne rencontre personne qui luy ressemble de visage, de parole ny d'habit: Mais ceux approchent plus pres de la verité qui estiment que c'est vn Demon qui a pris la figure d'un Cauallier, comme il à peu faire, puis que les diables se transforment quelquefois en Anges de lumiere. C'est donc ce melme Cauallier qui montoit autrefois sur le dos de S. Hilarion, & qui luy apparoissoit quelquefois en forme de gladiateur avec autres combatants à outrance comme recite S. Hierosme, *psallenti gladiatorum pugna spectaculum præbuit;*

car si les Demons se delectent à représenter entre eux tels combats de gladiateurs pour tenter les gens de bien, qui doute qu'ils ne se plaisent beaucoup plus de venir aux mains avec les hommes pour les precipiter à la mort? Il est souuent aduenü que les desesperez & ceux qui tentent Dieu, tels que sont ceux qui se vont battre en duel, ont veu le diable en forme humaine, qui les a incitez à se desfaire, qui d'une façon, qui d'une autre, & quand ce sont personnes qui se plaisent à manier les armes, il leur persuade de s'exercer au combat avec luy, comme il aduinſt, il y a quinze ou seize ans à vn pauvre miserable desesperé, qui auoit perdu quelque notable somme au ieu, le diable s'estant apparu à luy en la forme d'un soldat de sa cognoissance, le suiuiſt en sa maison, ou estant il luy persuadea de tirer des armes avec luy, comme

par maniere de passer temps, & pour se diuertir, & s'exercerent à l'espee nuë long temps teste à teste en vne chambre, sans que le diable luy peust faire aucun mal, Dieu ne le permettant ainsi, iusques à ce que ce vieux singe mettant les armes bas, se mist à faire mille tours de souplesse, & feignant de luy en vouloir apprendre quelqu'un, luy fist mettre le col dans vn lacqs attaché au plancher, dont il eust esté estrâglé sans le secours d'autres personnes de la mesme maison qui suruindrent à ce dangereux spectacle. Il n'en est pas ainsi aduenü à ces pauvres miserables qui se sont battus avec ce Cauallier, vraiment solliciteur, puis que bien souuent pour ie ne sçay quelle friuolle imagination qu'il insinue dans les esprits de ceste courageuse noblesse, il la sollicite & la porte à vn euident & certain desespoir. Chacun sçait le

conte de ces deux seigneurs qui estoient prests de s'entrecoupper la gorge parce qu'ils portoient mesmes armes (à sçauoir la teste d'un toreau) si le prudent & plaisant iugement d'un Roy d'Angleterre ne fust interuenue, par lequel il ordonna que l'un porteroit pour ses armes la teste d'un Taureau, & l'autre d'une vache, & par ce moyen les rendist différents. Et qui sçait si ces deux grandes querelles sur le subiect desquelles ces deux vail-lants Caualliers sont demeurez sur la place, ne prouenoient point, ou de ce que l'ombre de l'un d'eux s'estoit meslee avec celle de son aduersaire, & ce par la faute de l'un, ou de l'autre, ou de ce qu'ils auoient songé en dormant des songes desaduantageux, & qui touchoient respectiuemēt leur honneur, ou de quelque autre semblable contention, c'est ainsi qu'il se faut tenir au point d'honneur, & ne pro-

diguer sa vie & son sang que pour des offres grandes & signalees.

Courage vertueuse noblesse, vos armes ont passé par tous les coins du monde, le reste des hommes ensemble ne peut pas résister à la pointe & au tranchant de vos espees, volontiers, que ne pouuant trouuer ailleurs au monde de plus braues & courageux guerriers que vous mesmes, vous prenez vn singulier plaisir, & ce vous est vne insigne gloire de vous esprouer les vns contre les autres, vous l'avez faict, & les faictes encore tous les iours, mais vous voyez à present que les Demons veulent estre de la partie, en voicy vn qui a faict paroistre son courage en ce dernier combat, il a faict acte de Gentilhomme. Souuenez-vous donc desormais que vous n'avez plus des hommes à combattre mais des diables, *nunc etiam manes, hæc intentata manebat fors rerum,*

& que vous vous deuez proposer la
conqueste des enfers & non pas seule-
ment empescher que l'enfer n'entre-
prenne sur la France.

Handwritten text at the top of the page, likely bleed-through from the reverse side. It is mostly illegible due to fading and blurring.

Handwritten text at the bottom right corner, possibly a signature or a date. It appears to read "29/11/54" followed by a name that is difficult to decipher.







